

«Al è pront di gustâ Isaac, nin cjase! Moviti! E alore? Vegnistu o no vegnistu, che la mignestre si disfrede! Prove tu, che tu sês so nono, a clamâ chel cjastron!»

«Porco fûr! Rivistu o no rivistu? Jere ore! Se âstu scuviert cul stâ dute le matine a pierdi timp tal broili?»

«Pal moment o pues nome dî, cun sigurece, che i miluços a colin jù, dal miluçâr, a plomp, in linie drete, drete».

«Brâf, orpo! Pecjât che no àn ancjemò metût il Nobel, che tu lu varessis cjapât di sigûr!»

«Nono, no stâ coionâmi. Tu, sâstu parcè che a colin i miluços?»

«Parcè che a pesin, macaco! Il pecol si distache da ramace e i miluços a colin!»

«Sì! Ma parcè pesino?»

«Tu, come i miluços, cul timp tu deventarâs grant e tu pesarâs simpri di plui. Se tu vessis il pecol sul cjâf e tu fossis tacât te ramace tu colaressis ancje tu».



«Nono! Se no tu sâs rispuindi no stâ stâ a cincuantâle. Jo ti dîs che il miluç al pese par vie che te Tiere, e alore ancje tal broili, sot dal miluçâr, e je une fuarce misteriose e invisibile che lu tire jù. E jo o ai di rivâ a cjatâle!»

«Bravonon! Se tu le cjatis, viôt di provâ a tacâle te vuarzine che o sparagnìn di mantignî il bo!»

«Bundì siôr Newton, isal cjase Isaac?»

«Velu là chel stupidel che al è a pene tornât tal broili. Al sta sentât sot dal miluçâr che al spiete che colin i miluçs! Almancul che al fos bon di cjapâju sù pal purcit!»

«None, none! Clame il nono! O ai a pene cjatade la leç de gravitazion universâl!»

«Ah... E dulà jerie?»

CovidCurte day 20 - Conte nr. 8

#968